

# АКАФИСТ ПРЕСВЯТОЙ БОГОРОДИЦЕ ПЕРЕД ЕЯ ИКОНОЙ, ИМЕНУЕМОЙ “ЗНАМЕНИЕ” КОРЧЕМНАЯ

## Кондак 1

Взбранной Воеводе Победительная, Царице Небесе и земли, похвальная песнопения приносим Ти, Богородительнице, Ты же, яко имущая державу непобедимую, от всяких зол сохрани нас и град наш, да зовем Ти: Радуйся, Благодатная, Господь о Тобою, Ты же с нами, чудным образом милость Божию знаменающая.

## Икос 1

Архангели и Ангели и все воинство сил безплотных немолчно славословят и служат Ти, главы своя преклоняя: мы же грешнии недоумеем, откуда начнем восхваляти Тя по достоянию, обаче дерзая на благосердие Твое, приносим Ти похвалы сия: Радуйся, Рождеством Твоим мир горний с дольным воссоединившая; Радуйся, младая Отроковице, по ступенем храма никимже держимая возшедшая. Радуйся, по обетованию родителей Твоих в храме Иерусалимстем воспитанная; Радуйся, Духом Святым введенная во Святая Святых. Радуйся, в храме Господни молитве и Богомыслию наученная; Радуйся, тамо пищу из рук Архангельстих принимавшая. Радуйся, яко житие Твое при храме прообразом жития иноческаго явися; Радуйся, всех скорбящих скорое утешение. Радуйся, Благодатная, Господь с Тобою, Ты же с нами, чудным образом милость Божию знаменающая.

## Кондак 2

Видевши, Пресвятая Дево, немощи человеческого естества, простре руку помощи вдовице некоей, пагубною страстию одержимей, яже вваде благословенную икону свою “Знамения” в корчемницу вина ради, вся убо расточи имения своя. Не по мнозех же днех, в себе пришедши, собравши пенязи на выкуп, принесе икону в дом свой; наутрие же не нашедши Ю в доме своем, тече паки в корчемницу и обрет икону свою, чудесно перенесенную, паде пред Нею, поя Богу: Аллилуиа.

## Икос 2

Разумеваючи чудесное пренесение иконы Твоея, Пречистая Дево, невидимыма рукама в корчемнице поставленная, вдовица отягчена сущи стыдом и жалостию, нача прилежно молитися со слезами: “Владычице, не лиши мя Покрова Твоего и милости!” Сиче и мы хвалу Тебе приносим: Радуйся, чудесно тайне воплощения Сына Божия послужившая; Радуйся, первее Его повившая и во яслех безсловесных овец положившая. Радуйся, первее поклонение Сыну Твоему

и Богу совершившая; Радуйся, млеко питавшая Питателя алчущих хлеба вечнаго. Радуйся, водою напоившая Подателя воды живья, текущая в жизнь вечную; Радуйся, одеждою покрывавшая одевающего небо облаки. Радуйся, иноков и инокинь Боголюбивых сладкая Отрадо; Радуйся, болящих и убогих совершенная цельбо. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 3**

Силою Твоей многомошной молитвы обрати на путь покаяния и нас, имущих слабую волю удобопреклонную греху, яко паче жены тоя согрешаем ежечасно пред Сыном Твоим и Богом. Не тщимся воспрянути от сна греховнаго, и не понимаем, како жизнь наша преходит, яко день вчерашний, иже мимо иде, но яви нам милосердие Твое, еже с надеждой вопити Тебе: Аллилуиа.

### **Икос 3**

Имущи милосердие неоскудеваемое, Ты, Благая Мати, простираеши руце Свои на умоление за всех скорбящих и недугующих и самым отчаянным помощь подаеши, яко непрестанно молиши Сына Твоего Возлюбленнаго не токмо простити нас, но и даровати нам обитель в Царствии славы, якоже Сам речет: “В дому Отца Моего обители многи суть”. Да прославим Тя, богатыю в милости: Радуйся, кладезю неисчерпаемый дивнаго милосердия Твоего к миру скорбному; Радуйся, хитон нешвенный Сыну Твоему исткавшая, о нем же воины у Креста Его меташа жребий. Радуйся, двери милосердия Твоего нам отверзающая; Радуйся, во объятия Своя приявшая Объемлющаго весь мир. Радуйся, на руку Сына Твоего вознесенная к Великому Престолу; Радуйся, в уверение о близком Успении Твоем рая вравие с неба Архангелом принесенное, дивному Иоанну показавшая. Радуйся, Вселюбивая Мати наша, любовию Своею нас, труждающихся и обремененных, покрывающая; Радуйся, обетованием Святаго Духа купно с Апостолами обрадованная. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 4**

Недоумет ум наш, како прославити чудо милости Твоея ко вдовице, юже обратила еси к покаянию и даде ей непрестанно память имети о гресе своем. О, Мати Милосердия, помози и нам имети память о гресех наших и николиже забывати о часе смертнем, о часе, иже не минует ни едино создание на земли живущее. Како предстанем Сыну Твоему, како отвещаем Судии Праведнейшему? Аще не обратимся к покаянию и предстательством Твоим умолим Бога, поюще песнь: Аллилуиа.

### **Икос 4**

Слышавше о дивном пренесении иконы и о чудесах, от Нея бываемых, вси жители града Рязани начаша от того часа поклонение творити честному образу

Твоему и “Знамение” Корчемныя нарицати, якоже не возгнушалася еси в корчемнице явитися, лепту приношаху на удержание пред Нею лампы неугасимыя. Моли, Пресвятая Дево, Предвечнаго Бога, да не угаснет в сердцах наших огонь любви Божественныя, да с любовью восхвалим Тя: Радуйся, восхождением Своим по ступенем храма Иерусалимскаго научающая нас добродетельми, яко лестницею, восходити к совершенству; Радуйся, яко Ангели удивишася вхождению Твоему во Свята Святых. Радуйся, яко у Креста Сына Твоего чашу страданий до конца испившая; Радуйся, семикратными глаголы Сына Твоего со Креста, аки семью стрелами в сердце пронзенная. Радуйся, матерем чадородящим скорое вспоможение; Радуйся, явлением Святыя иконы Твоея град Рязань благословившая и всех нас возвеселившая. Радуйся, отчаянных и безнадежных к тихой и безмятежной жизни приводящая; Радуйся, плачущих матерей великое утешение, яко и Сама у Креста Сына Твоего: “Увы Мне, Свете Мой”, рыдавшая. Радуйся, Благодатная, Господь с Тобою, Ты же с нами чудным образом милость Божию знаменующая.

### **Кондак 5**

Богоразумный глас от иконы Твоея бываемый обратил есть на путь правый человека некоего, емуже прилучися быти во граде нашем, и прежде всех дел поклонение сотворшу Пречистому образу “Знамения”; явися бо ему в сонном видении образ сей, и кроткий глас Твой вещаше от Него: “Се Аз приидох к тебе, понеже посетил Мя еси и обратился еси от скверны”, и обеща вспоможение в устройении дел его. О, Царице многомилостивая, дай и нам не познати гнева Твоего за безчестие наше, но услышати всепрощающий глас Твой, Богу же воспети: Аллилуиа.

### **Икос 5**

Узрев сие дивное Твое промышление о грешнице, человек той хотяй встати на путь нечестия, воспрянув от дремания, абие же тече к пресвитеру церкви Преподобнаго Симеона и моляще его, да сотворит благодарственное молебное пение в храме, идеже бысть ему явление Твое, многжды повергаяся ниц, моляще всех пети: “О, Всепетая Мати!” Мы же ни единою токмо, но многочастне получая помощь Твою, благодаряще хвалу приносим: Радуйся, от пути нечестия внезапно верных отводящая; Радуйся, скорби и радости земной жизни с Сыном Твоим разделившая. Радуйся, Архангельское благовестие со смирением принявшая и нас тем смирению научающая; Радуйся, Слово Божие во храме возлюбившая и исполнившая, яко таковой Сыном Твоим блаженнейшыя нарицаются. Радуйся, иноков Богомудрых ко спасению незримая руководительнице; Радуйся, веры православныя надежная ограда и утверждение. Радуйся, всех отринутых и униженных правое возведение; Радуйся, корень девства и цвете чистоты. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 6**

Проповедует вся вселенная чудныя милости от икон Твоих чудотворных являемыя, воспоминаем и мы, како дивно спасла сей град Рязань от всегубительныя болезни, егда людие страхом внезапныя смерти одержимии притекоша с верою и надеждою к иконе Твоей, с пением обносяще Ю окрест домов своих. И оправдана бысть вера их в милосердный Покров Твой, ибо ни единому бысть умерети от болезни тоя из домов тех, да в радости сердца воспеша людие Богу Спасителю: Аллилуиа.

### **Икос 6**

Возсия благодать от цельбоносныя иконы Твоея “Знамение”, пред Нею же и мы преклоняем колена и сердца наша, и со слезами благодарим, како избавила еси толико людей от наглыя смерти. Избави нас, Пречудная Владычице, от смерти без покаяния и умоли Спасителя, да в час кончины нашея не лишит нас причащения Пречистых Своих Тайн Тела и Крове. Ей, Мати Божия, умоли! Да с верою и любовию во уповании зовем Ти: Радуйся, Мати Света незримаго; Радуйся, тайных подвижников поры и благочестия, среди мира живущих, непрестанная Помощнице. Радуйся, Сама им благословение на молитву и подвиги подающая; Радуйся, к трудолюбию и милосердию верных рабов Твоих направляющая. Радуйся, в сонних и видениях избранныя Своя посещающая; Радуйся, заповедей Господних первая Исполнительнице. Радуйся, всем любящим и чтущим Тя жизни вечныя сподобляющая; Радуйся, беспомощных сирот и вдовиц присная Охранительнице. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 7**

Хотя явити дивное милосердие от иконы Твоея, Ты, Милостивая, егда в годину пагубныя болезни велий бысть зной воздуха, яко и земля изсохше и былие возгоресе от палящаго солнца, возгоресе огонь велий в бору близ града Рязани. Ты же, по молитве человека некоего, умом и сердцем пред иконою Твоею “Знамение” стояти мнящася, чудесно угасила огонь велий и землю одождила еси преизобильно. Прославляюще Бога, дивную песнь воспеваем Ему: Аллилуиа.

### **Икос 7**

Дивно Ты угасила еси пламень горящий, близ града нашего. О, Пречистая Дево! Единая нам надеждо и утешение! Молим Тя: угаси пламень страстей наших, помози нам стяжати блаженное безстрастие, зане создани есмы по образу Божию и малым чим умалени от Ангел, но в забвении предаемся беспечности и страстем нашим. Тебе же с любовию хвалу поем: Радуйся, одесную Сына у Престола Его стоящая; Радуйся, песнь Ангелов: “Слава в вышних Богу” первее услышавшая. Радуйся, ублажаемая от всех родов по реченному Тобою; Радуйся, яко душа Твоя величит Господа. Радуйся, воспоминающи страдания Сына Своего много дней жизни Своей на Голгофе провождавшая; Радуйся, Чаше много-

ценная, до края исполненная Божественная благодати. Радуйся, от помышлений суетных ум наш очищающая; Радуйся, кающихся грешников молитвы Сама к Богу приносящая. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 8**

Странно бысть чудо Твое, егда человек некий, имея нозе свои одержиме лютым недугом, видом багряне и в язвах сущи, никиими же врачии спасен бысть, пришел к иконе Твоей, моля Скороу Помощницу в скорбех, и получив совершенное исцеление, паде ниц благодаряще. Исцели, Целительнице Благая, и наши душевныя и телесныя немощи, нас поющих немолчно песнь Богу: Аллилуиа.

### **Икос 8**

Вся возможна Тебе суть, Пречистая, яко Ты еси Мати Единаго от Святыя Троицы, покрый нас Покровом милости Твоея, умоли о нас Сына Твоего, да продлено будет время жизни нашея на покаяние, да остающиися дни до кончины нашея проживем в чистоте, целомудрии и творении дел милосердия, яко да услышим сладкий глас Его, призывающий благословенных наследовати Царствие Божие, Тебе же со умилением зовем: Радуйся, хладныя души к познанию истины путями неисследимыми приводящая; Радуйся, величием, яко венцем, увенчанная от Святыя Троицы. Радуйся, Премилостивая, с высоты славы Твоея земнородных не презирающая: Радуйся, заповедей Божиих искусни делателе нас являющая. Радуйся, в час кончины нашея духов тьма далече от нас отгоняющая; Радуйся, чистоту веры Христовы, яко драгую жемчужину, сохраняти Церкви нашей помогающая. Радуйся, мрачныя души человеческия Светом Божественныя благодати внезапно озаряющая; Радуйся, всем, близ потопления сущим, якорь спасения подающая. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 9**

Все упование наше возложим на Тя, Препоблагословенная Богородице, молим Тя: простри Свои Пречистей руце на умоление к Сыну Твоему и Богу нашему; буди Споручница нам, грешным, окажи нам милость, zde на земли живущим; наипаче же тамо, в стране дальней, идеже несть печаль, ни воздыхание, но Ангельские лики поют непрестанно Божественную песнь: Аллилуиа.

### **Икос 9**

Ветии многоглаголивья умолкоша, такожде и силы горния преклониша главы своя пред Славою Твоею, яко Ты еси Царица небесе и земли, обаче с высоты славы Ты и земных не оставляеши, якоже и жену некую, скорбь о умершей дщери своей имущу и от лютыя болезни ног страдавшу, егда бо жена сия повеле нести ея в часовню к Пречудней иконе Твоей и zde по слезней молитве получивши совершенное здравие телесное и покой душевный, прослави Тя, Мило-

стивую Целительницу. Темже и мы похваляем Тя сице: Радуйся, Славу Божию непрестанно зрящая; Радуйся, в горнем Всесвятлем Иерусалиме сонмом Ангелов окружаемая. Радуйся, неизмеримая Глубине любви Божественныя; Радуйся, до окончания земной жизни Своя посещавшая святыи Гроб Сына Твоего и тем научающая нас память имети о могилах присных нам. Радуйся, с Сыном на Голгофе спострадавшая, по реченному старцем Симеоном: “Тебе же Самой оружие пройдет душу”. Радуйся, в мори житейстем бедствие терпящим руку простирающая, якоже Сын Твой Петрови. Радуйся, яко Тя вся тварь Божественными песньми величает; Радуйся, кротких и нищих духом скорое услышание. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 10**

Спасти хотя человечество от вечныя смерти, Господь наш Иисус Христос, воплотившийся от Пренепорочныя Девы Марии, даде нам Матерь Свою в покров и защищение, усыновив Ей с Креста весь род человеческий. Ты же, яко мост крепкий, приводяй нас от земли на небо, с любовию помогаеши всем прибегающим к Тебе, никто же бо отходит от Тебе не услышан, аще просит полезное и Богу поет: Аллилуиа.

### **Икос 10**

Стено неборимая всем людем, искупленным Пречистою Кровию Сына Твоего, Ты еси, Чистая, Едина наша надеждо, Едино прибежище. Кто слезы наши отрет? Кто даст мир смущенней душе нашей, аще не Ты, Единая всем нам Мати? Да с любовию хвалу Тебе воспеваем: Радуйся, лучезарная заре веры Христовы; Радуйся, от Херувим и Серафим немолчмо воспеваемая. Радуйся, в доме Апостола Иоанна в смирении и кротости пожившая; Радуйся, за посещение Голгофы и святаго Гроба по воскресении Сына Своего от иудей гонимая. Радуйся, яко Благаго Царя Благая Мати нарицаешися; Радуйся, слезы скорбных отирающая рукою милосердною. Радуйся, яко о Тебе радуется Ангельский собор и человеческий род; Радуйся, Святыя иконы Своя в залог любви Своя вечныя на земли нам оставившая. Радуйся, и во граде нашем икону Свою явившая. Радуйся, Благодатная, Господь с Тобою, Ты же с нами, чудным образом милость Божию знаменующая.

### **Кондак 11**

Пение хвалебное приносим Ти, Пречистая Дево, и молим Тя: исцели неисцельныя наша болезни душевныя и телесныя, помози нам возстати из тины греховныя, научи нас исполняти вся заповеди Господни, да имамы дерзновение в молитвах наших, и Ты, Милостивая Заступнице наша, приклони ухо Твое к мольбам нашим, да якоже благонравнии раби Твои Божественному Сыну Твоему воспоем: Аллилуиа.

### Икос 11

Светозарная икона Твоя “Знамение”, издревле преносима бысть из часовни в храм, в понедельник Светлыя седмицы, яко же первое воспоеся пред иконою Твоею Ангельское приветствие: “Чистая Дево, Радуйся! Твой Сын воскресе тредневен от гроба!” И сим убо священнодействием начинася молебное пение в приходских домех. Темже и мы, воспоминаая сие, радостно славим Тя: Радуйся и красуйся, Чистая, о востании Рождества Твоего; Радуйся, Пресвятая Мати, яко воскресе Сын Твой, да наша души совоскресит с Собою. Радуйся, яко по святому преданию Ты, Пресвятая, Учительница была еси отроку Сыну Твоему; Радуйся, яко странно бе учение сие Сына Всеведущаго и Вездесущаго. Радуйся, Лазаря четверодневнога, епископа острова Кипра, посещением Своим обрадовавшая; Радуйся, попечением и молитвами Твоими земную Церковь умножившая. Радуйся, изнемогающих от искушений духа и плоти нас десницею Своею избавляющая; Радуйся, в смирении и терпении живущим путь в Царствие небесное указующая и двери рая отверзающая. Радуйся, Благодатная, Господь с Тобою, Ты же с нами, чудным образом милость Божию знаменающая.

### Кондак 12

Благодать восхотев даровати пастве Своей от цельбоносныя иконы Твоя “Знамение”, Боголюбивейший святитель града Рязани Гавриил, в смирении и кротости житие свое провождаше, яко и повествуется о нем, повеле изнести с честию икону Твою из корчемницы и соорудив часовню каменную при храме Преподобнаго Симеона Столпника, в поклонении всех мимоходящих постави Ю, да прославляют Тя вси, Пречудная Царице, и Сыну Твоему поют: Аллилуиа.

### Икос 12

Поюще Твоя милости и чудеса, даже до ныне являемый верным рабом Твоим, поклоняемся предивному образу Твоему, явленному во граде Рязани, яко Тебе Самой, и молим Тя со слезами: научи нас, что сотворим, да угодны будем Тебе и Богу. Мы, не имущии не токмо дел, но и словес благих, чим воздадим Тебе за вся благодеяния Твоя? Но надеясь на милость Твою, славим Тя со умилением: Радуйся, в страданиях за Христа мучеников укрепляющая и дух преподобных возвеселяющая; Радуйся, святому праведному Иосифу в послушании послужившая. Радуйся, богатая милостию, в доме Обручника труды и обстояния ради святаго семейства Своего понесшая; Радуйся, странным рождеством Сына Твоего пред всеми матерьми возвеличенная. Радуйся, небесе с землею примирение; Радуйся, Всесветлая Звезда, сиянием Всечистыя души Твоя мир скорбный озаряющая. Радуйся, Царице небесе и земли, в безконечныя веки царствующая; Радуйся, всем нам Мати Вселюбимая и Всемиловитая. Радуйся, Благодатная, Господь с Тобою, Ты же с нами, чудным образом милость Божию знаменающая.

### **Кондак 13**

О, Пресвятая Владычице, Дево Богородице, Мати Господа нашего! К Тебе припадаем и молим Тя: помилуй и спаси нас, недостойных Твоего милосердия. Услыши нас, Пречистая, не ввери нас человеческому предстательству, но Сама помилуй нас к жизни сей, и в будущем веце соделай нас наследниками Небеснаго Царствия; яви нам Знамение милости Твоея, да прославим безмерное милосердие Твое и Богу воспоем Херувимскую песнь: Аллилуиа.

**(Этот кондак читается трижды, затем икос 1 и кондак 1)**